

淳化閣帖釋文

一



文釋帖閣化淳

(一)

詳不人撰

四庫全書總目

校正淳化閣帖釋文十卷

乾隆三十四年詔以內府所藏宋畢士安家淳化閣帖賜本詳加釐正重勒貞珉首冠以御題寓名蘊古四字及御製淳化軒記命諸臣校正摹勒諭旨未載原帖舊跋及諸臣書後其中古帖次第一從舊刻而於朝代之先後名字之標題皆援證史文裁以書法俾不乖於春秋之義每卷皆恭摹御筆論斷昭示權衡又參取劉次莊黃伯思姜夔施宿顧從義王澐諸說而以大觀太清樓諸帖互相考校凡篆籀行草皆注釋文於字旁復各作訂異以辨正是非別白疑似誠爲墨林之極軌書苑之大觀乾隆四十三年侍郎金簡以石刻貯在禁庭自宣賜以外罕得仰瞻乃恭錄釋文請以聚珍板摹印俾共窺八法之精微由是流布人間遂衣被於海內考張彥遠法書要錄未有右軍書記一卷所載王羲之帖四百六十五附王獻之帖十七並一一爲之釋文劉次莊之釋閣帖蓋卽以是爲藍本然彥遠書傳寫多訛次莊書至南北宋間陳與義已奉勅作法帖釋文刊誤一卷今附刻韋續墨藪之末則次莊所釋不盡足據可知第諸家雖知其有訛而辨訂未能悉當遞相駁詰轉益多歧恭逢我皇上天縱聰明游心翰墨裁成韻籀陶鑄鍾王訓示儒臣詳爲釐定書家乃得所指南是不惟臨池者之幸抑亦漢晉以來能書者之至幸矣

御製淳化軒記

游六
藝圖

淳化軒何爲而作也。以藏重刻淳化閣帖石而作也。蓋自伏滔崆峒之銘。石虹堯碑之文。歷代相傳。石刻尙焉。然物有其成。必有其壞。世遠年湮。眞僞莫辨。則漢唐且難得其全者。無論周秦以上矣。故言帖必以趙宋爲猶近。而宋帖必以淳化爲最美。重刻之由。考稽之故。已見於帖前之旨。冊後之跋。茲不復記。記所以藏石作軒之故云。石刻旣成。凡若干頁。使散置之。慮其有失也。爰於長春園中。含經堂之後。就舊有之迴廊。每廊砌石若干頁。恰得若干廊。而帖石畢砌焉。廊之中原有蘊眞齋。因稍移齋於其北。卽舊基而拓爲軒。事起藏帖。則以帖名名之。夫淳化。宋太宗之紀年也。爲人君者。卽不能以唐堯虞舜爲師。亦當以夏甲周成爲軌。所謂取法乎上。僅能得中耳。若宋太宗。始終家國之間。慙德多矣。吾所不取。而又有何慕於淳化。而以之名軒爲哉。

壬辰清和御筆

〔鑑古〕

圭璋
文府

雲落
煙紙

淳化
圖書
珍祕
寶

朕幾餘不自暇逸。典學之優。時及臨池。曩曾輯內府所藏前人墨蹟。刻爲三希堂墨妙軒二帖。廣示藝林。復念古帖流傳。可補墨跡所未備者。惟宋淳化閣帖。鑄集尤爲美富。遠出大觀太清樓諸本之上。但惜初搨與賜者絕尠。或云版尋殘損。當時已爲難得。後來翻刻愈繁。真意寢失。有志追摹者。末由津逮。內府舊藏淳化閣帖極多。而此畢士安所得賜本。搨最精好。爰特勅選工。鈎摹上石。冀復舊觀。第王著昧於辨別。其所排類標題。舛陋滋甚。不當聽其沿譌。以誤後學。因命于敏中等。詳加考正。以次呈閱。候朕參定。分識各卷。並命蒐採諸家釋文。依字旁注。其互異者。折衷附記於後。以資省覽。是於考文稽古之中。兼寓舉墜訂譌之益。用嘉惠海內操觚之士焉。特諭。

乾隆三十四年二月六日御筆

乾

隆

用
心
筆

淳化閣帖 御題



富貴

淳化閣帖 御題



淳化閣帖
御風

御風

淳化閣帖 御題

古



淳化閣帖第一

歷代帝王法帖

夏后氏大禹書

舊標夏禹列卷五今從史例改題並移此

出令聶子星紀齊春其尙節化

謹案右一帖篆書二行十二字

後漢章帝書

舊止標漢今從史例增後字

辰宿列張盈昴海鹹河淡鱗羽翔龍師火帝鳥官人皇始制文字乃服衣遐邇壹體罔談彼短無恃己長尺璧非尙寸陰是競孝當竭力忠興溫若思慎終宜令學優登仕攝職從政都邑二京背芒面洛浮渭既集墳典亦

謹案右一帖章草九行八十四字

晉武帝書

省啓知既下須防具具揚州實欲可可者比尙擬之動靜更啓也數遣信還

謹案右一帖草書四行二十九字

晉元帝書

以下舊標東晉今從史例刪東字

乾隆
鑑賞

淳化
圖寶
珍祕
書軒

安軍未報平和之如何深可爲事也。

謹案右帖草書三行十四字。

八月九日睿頓首忽中秋但有遠懷便微冷恆何如比殊不能佳惟勿得慰抱念及不多司馬睿頓首。

謹案右一帖草書五行三十九字。

晉明帝書

伏想墓次安隱守視文武平安。

謹案右一帖行楷二行十二字石本不釋今附錄餘仿此。

晉康帝書

陸女郎問訊如此可籌量之。

謹案右一帖行楷二行十一字今附錄。

晉哀帝書

不死罪死罪承中書郎君疾患比委療情以灼怛伏念垂心憂勞想得治力漸佳不死罪死罪。

謹案右一帖行楷四行三十六字今附錄。

晉簡文帝書

昱白所示慶賜事具具此莫大之禮天下大慶得率由舊章慰答民望甚爲盡善但奢則不適於時儉

則陋而不典。正當斟酌其宜。令得會中耳。

謹案右一帖。行楷六行。五十五字。今附錄。

晉孝武帝書

舊誤標東晉武帝今考正

比得譙王書。有欲仙語。吾答之如別。卿前云宜卿譙王。參之於衆。云公書卿私書。君輒從衆。以吾觀之。寧當許也。想所謂爾。

謹案右一帖。行草五行。四十七字。

宋明帝書

鄭脩容有兄喪。今成服。汝可令汝內人知之。再報休祜。休範二家內人知也。殘報。

謹案右一帖。行草四行。三十一字。

齊高帝書

吾今至破堽。在路粗可。尋還遲。見卿不遠。願信知卿深意也。

謹案右一帖。草書四行。二十三字。

梁武帝書

舊誤分武帝高帝爲二今併

數朝腳氣。轉動不得。多有憂懸情也。二謝處委曲。復當有情。故舊數有書問。不可復有興也。知何時再言話報之。

謹案右一帖草書五行四十三字。

衆軍行人最。今封如別。曹郢州近遣樊士真領三百人。猶在漁湖。其應用行。合應有四千人。故指白蕭衍疏。

謹案右一帖。卽舊列爲梁高帝書者也。楷書五行四十一字。今附錄。

梁簡文帝書

知康司馬卓。以水淺未時發。漢源冬涸。理當有。訪過舟有及具意。綱答。

謹案右一帖。行楷四行二十七字。今附錄。

隋文帝書

舊列卷五第十。標隋朝法帖。今移改。

皇帝敬問婺州雙林寺慧則法師。朕尊崇聖教。重興三寶。欲使一切生靈。咸蒙福力。法師捨離塵俗。投志法門。專心講誦。宣揚妙典。精誠如此。深副朕懷。旣利益羣生。當不辭勞也。猶寒道體。如宜。今遣使人指宣往意。

謹案右一帖。行楷八行八十二字。今附錄。

唐太宗書

舊二十三帖。今併一帖。移四帖入高宗書。

兩度得大內書。不見奴表。耶耶忌欲恆死。少時間忽得奴手書。報娘子患。憂惶一時頓解。欲似死而更生。今日已後。但頭風發。信便卽報耶耶。若少有疾患。卽一一具報。今得遼東消息。錄狀送憶奴。欲死不知何。

計使還具耶耶勅。

謹案右一帖行草十行八十七字。

懷讓患水邊身腫復利形勢極惡耶耶意多恐不濟遣愛勞發大重氣候似少可於豆盧亦似難差傷念不可言奴報其婦知也。

謹案右一帖行草六行四十九字。

使至辱書知公所苦少可慰意何言不知信復更復何似時氣漸冷善將息也所請景賢公卽宜留聽追然後遣若無好藥更遣揀擇今爲北邊動靜奉勅卽行相去大近信使非遙實情欣悅耳遣無具李世民呈。

謹案右一帖行草十一行八十一字。

比者久嬰沈疾虛弊何言昨旦臨朝略無勞懣看此稍望平復未知於後何如且用慰心自怡而已昨夜痛發少覺勞弊所以不能相見若有事進勅十一日。

謹案右一帖行草十行六十字。

昨日來體履似漸可始聞卿不佳旦來何似勅。

謹案右一帖行草三行十八字。

三五日來漸望平復所以不能相見恐更勞發勅。

謹案右一帖行草三行十九字。

雅州只爲造船急。所以如此。早與書莫聽急。賊已至。萬發兵恐少。勅。

謹案右一帖行草四行二十六字。

卿與道宗。誰已得多馬。明當至。故遣問。卽報。勅十四日。

謹案右一帖行楷二行二十一字。今附錄。

所疾者。漸可。不至憂耳。

謹案右一帖行楷一行九字。今附錄。

北邊始有表至。甚無事。故書相報。勅。

謹案右一帖行草二行十四字。

八柱承天。乾道由其廣運。四維紀地。坤元所以載安。是知締構經綸。必佇風雲之佐。變諧樞宇。咸資川嶽之靈。故軒丘御展。六相宣其景化。嬌水乘時。五臣濟其鴻業。

謹案右一帖行草八行六十三字。

數日來氣發。今旦服一飲。子不得相見。有事進狀。勅中書門下三品。廿七日。

謹案右一帖行草五行二十九字。

門下中書省。及侍郎給事中。舍人。員外郎。鎧曹。參軍。左右庶子。明日移營向五橋南一二里著。勅三日。

謹案右一帖行草五行三十九字。
數日來患痢。今雖稍可。猶自虛憊。欲三五日將息。諸司有事進狀。勅十一日。

謹案右一帖行草五行二十九字。

昨令今日引高麗使人辭明日將來。勅二日。

謹案右一帖行草三行十七字。

卿昨日道服蜀葵。可錄方將來。勅廿三日。

謹案右一帖行書二行十六字。今附錄。

唱箭處。只道官號及姓。不唱名。不知是何人。想且應合唱名。勅三日。

謹案右一帖楷書三行二十六字。今附錄。

五言秋日毀庚信體

嶺銜霄月桂。珠穿曉露叢。蟬啼覺樹冷。螢火不溫風。花生圓菊葉。荷盡戲魚通。晨浦鳴飛鴈。夕渚集栖鴻。颯颯高天吹。氛澄下燝空。

謹案右一帖楷書六行五十八字。今附錄。

數年來每有征勳。雖復事非爲己。猶恐下有怨咨。所以廢甘泉之遊。寧可違涼忍暑。不能適己勞民。想汝誠心。惟吾是念。自非孝情深結。孰能以此爲懷。省書潛然。益增感念。善自將愛。遣此不多。哥。

哥勅。

謹案右一帖行草九行八十二字。

唐高宗書

舊八帖今歸入太宗四帖

不審夜來胸氣何似。想當漸散。痾復斷未。江叔所患。竟不痊除。奄然逝。聞問悲痛。哽咽何言。想叔同氣之傷。故當難處。今故遣使往。參具無委。諮。

謹案右一帖行草七行五十五字。

叔藝韞多材。慈深善誨。藹夙奉趨庭之訓。早擅臨池之工。聞其比來復愛飛白。昨故戲操翰墨。聊以示藹。慙六文之麗則。異五際之芳詞。忽枉來書。談飾過實。顧惟非迹。非敢當仁。披覽循環。祇以增愧。故斯表意。餘不多云。諮。

謹案右一帖行草十一行八十五字。

使至得所進枇杷子。良深慰悅。嘉果珍味。獨冠時新。但川路既遙。無勞更送。今者梅炎藻夏。麥氣迎秋。香飄蘭坂之風。鏡轉桂巖之月。爲善之暇。想足怡神。延望白雲。載深離緒。聊疏綠事。此不多申。諮。

謹案右一帖行草九行七十六字。

太子無事。欲僻洛城西門仗聽。更不須覆奏。勅廿三日。

謹案右一帖行草三行二十一字。